

Powšitkowne WOZJEWJENJA

njedźelu, 8. septembra 2024

Na Dnju wotewrjenego pomnika Worklečansku kapałku a Smochčanske kubłanišćo sej wotkryć

Kapałkowe towarstwo we Worklecach přeprašuje wšitkich zajimcow, sej tamnišu kapałku wobhladać, a to na Dnju wotewrjenego pomnika njedźelu, 8. septembra, wot 14.00 hodź. Na krótkich wodženjach zhonja to a tamne wo jeje stawiznach. Zdobom změja přiležnosć k swačinje. W 17.00 hodź. budže w kapałce tohorunja nyšpor. Samsny dzeń móža sej zajimcy w 14.00 a 15.00 hodź. tež Smochčanske kubłanišćo swjateho Bena we wobłuku wodženja wotkryć. W tamnišej bróžni budže zdobom přiležnosć k rozmołwje při kofeju a tykancu.

Wusyłanje Božej mše

Serbskorěčnu Božu mšu jako livestream z Chróścic přenjesu tutu njedźelu 8. septembra, wuwzaćnje hižo rano w 7.00 hodź. Link na nju je w interneće pod www.posol.de kaž tež na wosadneje stronje podaty. Boža mša w 9.00 hodź. w Chróścicach njebudže.

Na duchowny koncert

Chór 1. serbskeje kulturneje brigady wuhotuje njedźelu, 15. septembra, w 17.00 hodź. nyšpor w formje duchowneho koncerta w Budyskej cyrkwi Našeje lubeje knjenje. Samsny koncert poskići chór njedźelu, 22. septembra, w 17.00 hodź. w Bačońskej cyrkwi. Wšitcy zajimcy su wutrobnje přeprašeni.

Zhromadny dzeń za 1. a 2. lětnik

Dekanatne dušepastyrstwo za džěci přeprašuje šulerki a šulerjow 1. a 2. lětnika na zhromadny dzeń pod hesłom „Jězus – mój přećel“ w nazymskich prózdnicach do Don Boskoweho domu we Worklecach. Wupytać móža sej, hač so štwórtk, 10. oktobra abo 17. oktobra, wot 9.00 do 15.00 hodź. wobdžěla. Swójski přinošk wučinja pjeć eurow na wobdžělnika. Přizjewić měli so zajimcy hač do pjatka, 4. oktobra, online. Link je pod www.posol.de podaty. Ličba městnow je wobmjezowana.

Na zapokazanje kanonika Šćěpana Delana do Litoměřic

Ralbičanska wosadna rada so wo to stara, zo by móhl na zapokazanje kanonika Šćěpana Delana sobotu, 28. septembra, bus do čěskich Litoměřic jěć. Štóz by so rady sobu na puć nastajić chcył, njech so hač do soboty, 14. septembra, pak do lisćiny w interneće zapisa pak so wosobinsce pola Rafaela Ledźborja w Ralbicach přizjewi, telefonowe čisło (01 72) 7 87 33 41. Su-li wjacori w swójbje, kotřiž chcedža sobu jěć, njech so kóždy zapisa. Link za přizjewjenje w interneće je pod www.posol.de podaty. Planowane je, zo wotjědže bus w 13.30 hodź. z Radworja a w 14.00 hodź. z Ralbic. W 17.00 hodź. je Boža mša ze zapokazanjom. Bus drje wokoło 20.00 hodź. zaso wotjědže, tak zo změja wšitcy po kemšach trochu chwile něšto powječerjeć, a budže najskerje wokoło 22.00 hodź. w Ralbicach a trochu pozdžišo w Radworju. Płacizna móhła něhdže 28 eurow na wosobu wučinja, wotwisne wot toho, kelko ludźi sobu pojědže.

Nyšpor z požohnowanjom konjacych zapřahow

Towarstwo Cyrila a Metoda z.t. přeprašuje wšitkich wěriwych tež lětsa na wosebity nyšpor domchowanki z požohnowanjom konjacych zapřahow. Tón budže njedźelu, 29. septembra, w 14.00 hodź. na łuce při Hatkach w Chróscicach.

Portretowy koncert w Kulowje

Składnostnje 70. narodnin serbskeho komponista Ulricha Pogody wuhotuje orchester Serbskeho ludoweho ansambla (SLA) zhromadnje ze spěwnymi solistami a w Kulowje rodženym organistom Tomašom Žurom „Portretowy koncert za Ulricha Pogodu & Tomaša Žura“. Prěni budže sobotu, 7. septembra, w 19.00 hodź w Choćebuskim konserwatoriju, dalši njedźelu, 22. septembra, w 16.00 hodź. w Kulowskej cyrkwi Marije donjebjeswzaća. Nimo třoch wulkich piščelowych twórbow zaklinča spěwy a orchestrowe twórby, kotrež su w minjenych 30 lětach nastali. Na piščelach budže organist Tomaš Žur hrać. Zastupne lisćiki dóstanu zajimcy na internetowej stronje (SLA). Link je pod www.posol.de podaty.